

易

林

註

易林卷第十



巽上 離下 家人

天命赤烏與兵徼期征伐無道誅其  
君傲居止何憂

史武王渡河有火自上復于下至  
于王屋流為烏其色赤故武王伐  
紂以應赤烏之祥

之乾

千歲槐根身多斧癩傷癰擣理枝葉  
不出

無註

坤

嘑嘑諤諤虎豹相齧懼畏悚息終無  
難惡

無註

屯

娶於姜呂駕迎新婦少齊在門夫子  
懽喜

按春秋昭公二年夏四月韓須如  
齊逆女齊陳無宇送女致少姜少  
姜有寵於晉侯晉侯謂之少齊姜  
齊姓

蒙

膏壤肥澤民人孔樂宜利居止長安

富有

無註

需

生有聖德上配大極皇靈建中授我以福

書仲虺之誥成湯曰王懋昭大德建中于民

訟

耄老蒙鈍不見東西少者弗慕君不  
與謀懸輿致仕退歸里居

漢薛廣德上䟽乞骸骨歸里懸車

師

三狂北行道逢大狼暮宿患澤為禍  
堪傷

無註

比

更且初歲振除禍敗新衣元服拜受

利福

且當作旦元服首服也

小畜

杲杲白日爲月所食損上毀下鄭昭  
出走

按春秋鄭莊公娶鄧曼生世子忽  
又娶宋雍氏生公子突魯桓十一

年莊公卒忽立祭仲歸復立突忽  
出奔衛忽鄭昭公名

履

君子失意小人得志亂擾並作姦邪  
充塞雖有百堯顛不可救

無註

泰

仁德履洽恩及異域澤被殊方福慶



隱伏作蠶不織寒無所得

無註

否

東求金玉反得弊石名曰無宜字曰

醜惡衆所賤薄

無註

同人

擊鼓合戰士怯叛亡威令不行敗我

成功

無註

大有

仲春孟夏和氣所舍生我嘉福國無

殘賊

無註

謙

尹氏伯奇父子生離無罪被辜長舌

為災

伯竒尹吉甫之子父娶後妻而譖  
伯竒於吉甫父逐之言無罪而見  
逐皆後母長舌所為也

豫

三穀不熟民苦困急駕之新邑嘉樂  
有德

無註

隨

登虛望貧暮食無殮長子南戍與我

生分

無註

蠱

東市齊魯南賈荆楚羽毛齒革為吾

利寶

書禹貢荆及衡陽惟荊州厥貢羽

毛齒革

臨

節情省欲賊殺有度家給人足公劉  
以富

賊殺當作賦斂公劉后稷之曾孫  
也詩云乃積乃倉又言其既庶既  
繁

觀

恭寬信敏功加四海辟去不祥喜來  
從母

語子張問仁於孔子孔子曰能行  
五者於天下為仁矣請問之曰恭  
寬信敏惠

噬嗑

張狂妄作與惡相逢不得所欲生我  
獨凶

無註

賁

畫龍頭頸文章不成甘言美語詭辭

無名

無註

剝

騎龍乘風上見神公彭祖受刺王喬  
讚通巫咸就位拜壽無窮

彭祖古之有壽者王喬古仙人巫  
咸商臣名

復

溫仁君子忠孝所在八國為隣禍灾  
不處

無註

無妄

威權分離烏夜徘徊群蔽目光大人



誅傷

無註

大畜

學靈三年聖且明神先知善祥吉喜  
福慶神鳥來見告我無憂

無註

頤

東山家辭颯婦思夫伊威盈室長股

羸戶歎我君子役日未已

東山周公東征之詩我徂東山惓惓不歸又曰鶴鳴于垤婦歎于室又曰伊威在室伊威者鼠婦也室不掃則有之羸當作羸果羸枯樓也詩曰果羸之實亦施于宇蓋述其歸未至而思家之情也

大過

張頷開口舌直距齒然諾不行政亂

無緒

無註

坎

吹角高邦有夫失羊衆民驚惶敬言慎

避咎勅不行殃

無註

離

南行出城世得福祉王姬歸齊賴其所欲

春秋莊公元年王姬歸于齊言王室之女下嫁于諸侯也

咸

心狂老悖視聽聳類政令無常下民多孽

無註

恒

安上宜官一日九遷踰群超等牧養

恒山

漢田千秋一日九遷其官

遜

東鄰嫁女為王妃后莊公築館以尊  
王母歸于京師季姜悅喜

春秋魯莊公元年王姬下嫁於齊

命同姓諸侯主之曾以姬姓故築館而迎之冬王姬歸于齊桓公九年春紀季姜歸于京師為桓王后

大壯

六甲無子已喪其戊五丁不親庚失曾孫癸走出門

未詳

睽

安床厚褥不歸久宿弃我喜讌困於  
南國投杼之憂弗成禍災

戰國策秦甘茂曰魯人與曾參同  
姓名者殺人人告其母曰吾子不  
殺人織自若至於告之者三其母  
懼乃投杼而走

明夷

騎豚逐羊不見所望經涉虎廬亡身

失羔

無註

晉

陰霧不清濁政亂民孟秋季夏水壞

我居

無註

蹇

五方四維平安不危利以居止保有



玉女

無註

解

西賈巴蜀寒雪至轂欲前不得復反  
其室

巴蜀皆地名

損

剛柔相呼二姓為家霜降既同惠我

以仁

無註

益

天馬五道炎火分處往來上下住又  
駒亡衣柔巾麻相隨哭歌凶惡如何

未詳

夬

出門懷憂東上禍丘與凶相遇自為

災患

無註

違

西行求玉異得隨璞反見凶惡使我

驚惑

無註

萃

出入無妄動作失利銜憂懷禍使我

多悴

無註

升

高樓無柱顛僵不久紂失三仁身死  
牧野

史記商紂無道造鹿臺為瓊室高  
千尺罷苦萬民之力三仁微子箕  
子比干紂不能用其後武王伐紂

于商郊牧野

草

泉涸龍憂箕子為奴干叔隕命殷破  
其家

箕子紂親戚諫紂不聽佯狂為奴  
紂之諸父比干也直言諫紂紂怒  
殺之剗視其心

鼎

向食飲酒嘉賓聚會祥羊大猪君子  
饒有

無註

困

避禍逃殃身外不傷高貴疾顛華落  
墮凶

無註

井

張牙反目怒齧作怒狂馬燒犬道驚  
傷軫

未詳

震

黃牛駢犢東行折角異得百牂反亡

我囊

無註

艮

路多枳棘步刺我足不利旅客為心  
作毒

無註

漸

執斧破薪使媒求婦和合二姓親御  
斯酒居比鄰里姑公悅喜

無註

歸妹



駕車出門順時宜西福祐我身安寧

無患

無註

豐

日新東從魁杓為禍僕臺為秦使我

久坐

未詳

旅

山陵丘墓魂魄室屋精光竭盡長卧  
無覺

無註

巽

孩子貪餌為利所說探把金甌爛其  
臂手

無註

兌

何材待時閑戶獨愁丘蚓冬行解我  
無憂桑蚕不得女功弗成

無註

渙

解商驚惶散我衣裝君不安邦

無註

節

害政養賊背主入愆跋行不安國危

為患

無註

中孚

禍走患伏喜為我福凶惡消去災害

不作

無註

小過

老馬無駒病雞不鷓三雌獨宿利在

山北

無註

既濟

播天舞地嘒亂神所居樂無咎

無註

未濟

異國殊俗情不相得金木為仇酉賊

檀穀

未詳

☲  
☱  
離上  
兌下  
睽

倉盈庾億宜稼乘稷年歲有息

詩楚茨我倉既盈我庾維億我黍  
與與我稷翼翼此言述公卿之有  
田祿力於農事而作也

之乾

被服文衣遊觀酒池上堂見觴喜為

吾兄使我憂亡

無註

坤

邑姜叔子天文在手實沈參虛封爲  
晉侯

邑姜武王后叔子即太叔當邑姜  
方震太叔夢帝謂已余命而子曰  
虞及生有文在手曰虞遂以命之

及成王滅唐而封太叔焉參為晉  
星實沈參神也出左傳魯昭公元  
年

屯

改柯易葉飯溫不食豪雄爭強先者  
受福

無註

蒙



馨香陟降明德上登社神祐顧命予  
大鄰

詩文王陟降在帝左右帝上帝也

需

老狼白驢長尾大狐前顛卻躡進退

遇崇

無註

訟

山沒丘浮陸為水魚鸞雀無廬

無註

師

懿公淺愚不深受謀無援失國為狄所賊

春秋閔公三年狄人伐衛懿公好鶴鶴有乘軒者將戰國人皆曰使鶴遂為狄所滅

比

鼎煬其耳熱不可舉大塗塞壅旅人

心苦

無註

小畜

凶聲醜言惡不可聞君子舍之往恨

我心

無註

履

昧暮乘車履危陷溝亡失群物摧折  
兩軸

無註

泰

南有嘉魚駕黃取鱗魴鯉詡詡利來  
無憂

南有嘉魚詩篇名為燕享而作也

否

隔在九山往來勞難心結不通失其所權

無註

同人

下流難居狂夫多罷貞良溫柔年歲不富

無註

大有

狐狸雉兔畏人逃去分走竄匿不知所處

無註

謙

異體殊俗各有所屬西隣孤嫗欲寄我室主母罵詈終不可得

無註

豫

怒非怨妬貪得腐鼠而呼鵲鷲自令  
失餌致被困患

無註

隨

五心六意岐道多怪非君本志生我  
恨悔

無註

蠱

三班六黑同室共食日長月息我家

有德

無註

臨

方船備水旁河燃火終身無禍

無註

觀



翳屏獨語不聞朝市以利居服兔跛

後聞

無註

噬嗑

以處不安從反觸患

無註

賁

剝削髡人所殘弃批捍之言我心

不快

剝音擊髡音坤剝音又

剝

臯田禾黍搥壤麻阜衣食我躬室家

饒有

無註

大畜

匿病不醫亂政傷災紂作淫虐商破

其墟

書商紂無道淫酗肆虐武王伐之

遂滅商

無妄

金城朔方外國多羊履霜不時去復

為憂

無註

大過

焱風卒起車馳袍褐弃古追亡失其  
和節心憂懨懨

無註

頤

鬼泣哭枉悲傷無後甲子昧爽殷人  
絕祀

書曰甲子昧爽王朝至于商郊牧  
野伐紂滅殷

離

隨風騎龍與利相逢田獲三狐商伯  
有切衝衝之邑長安無他

周易解九二田獲三狐狐者邪媚  
之獸三狐指卦之三陰也

坎

耆老不明聞善不從自令顛沛敗為  
咎殃

無註

復

兩目失明日奪無光脛足跛躄不可  
以行頓於丘傍

無註

咸

三牛五牂重明作福使我有得疾人  
官獄憂在心腹

無註

恒

孟已乙丑哀呼尼父明德訖終亂害  
滋起

乙當作已哀公十六年四月己丑  
孔子卒

遁

華燈百枝消闇衰微精光訖盡奄如

灰縻

無註

大壯

鷹飛雉退兔伏不起  
弧張狼鳴野雞

飛驚

無註

晉

鬪戰天門身有何患  
室家具在不失



其歡

無註

明夷

東家殺牛行逆腥臊神背西顧命衰  
絕周亳社災燒宋人夷誅

易曰東鄰殺牛不如西鄰之禴祭  
春秋魯襄公三十年五月鳥鳴于  
亳社甲午宋大災亳當作亳

家人

陰陽辨舒二姓相合婚姻孔云生我

利福

無註

蹇

東入海口循流北走一高一下五邑

無主十日六夜死於水渌

未詳

解

孤竹之墟失婦無夫傷於蒺藜不見  
其妻東郭棠姜武氏以亡

孤竹國名易繇曰困于石據于蒺藜入于其宮不見其妻凶棠姜齊  
棠公之妻東郭偃之姊也武氏崔  
武子杼出左傳

損

天戶東墟盡既為災  
跼蹐黯聾秦伯  
受殃

跼音迸 蹐音湊

益

賴先休光受福之祉  
雖遭亂潰獨不  
危殆

無註

夫

折若蔽目不見稗叔三足孤鳥遠去  
家室

目當作日楚詞折若木以拂日兮  
若木木名在崑崙西極其華光照  
下地抱朴子日中有三足鳥

遘

二人同室兄弟合食和樂相好各得  
所敬

無註

萃

繼體守蕃縱欲廢賢君臣淫遊夏氏  
失身側室之門福祿來存

按左傳陳靈公與孔寧儀行父通  
於夏姬皆秉其衽服以戲于朝後  
陳靈公與孔寧儀行父飲於夏氏  
公謂行父曰徵舒似女對曰亦似

君徵舒病之十一年楚人殺陳夏  
徵舒

升

老狐屈尾東西為鬼病我長女坐涕  
詘指或西或東大華易誘

狐妖獸也鼻尖尾大性多疑出名  
山記

困

大樹之子百條共母當夏六月枝葉  
盛茂鸞鳳以庇邵伯避暑穉穉印甚  
各得其所

無註

井

井堙木刊國多暴殘秦王失戍壞其  
太壇

襄公二十五年陳侯會楚子伐鄭



當陳隧者并堙木刊史記楚將沛  
公破秦兵入咸陽降子嬰羽燒秦  
宮室火三月不息此言秦王失其  
戍守而至於社稷壞矣

革

駕黃買蒼與利相迎心獲所守不累  
弟兄

黃驪黃蒼蒼耳皆馬也

鼎

庾億倉盈年歲安寧稼穡熟成

無註

震

人生馬淵壽老且神飛騰上天舍宿  
軒轅居常樂安

無註

艮

思顧所之乃令逢時洗我故憂拜我  
歡來

無註

漸

魁罡所當初為敗殃君子留連困於  
水漿求金東山利在代鄉賈市有息  
子載母行

無註

歸妹

鉛刀攻玉無不鑢鑿龍體其舉曾班  
為輔三仁翼事所求必喜

魯班公輸子之名

豐

喜來如雲舉家蒙歡眾才君子駕福

盈門

無註

旅

響像無形骨體不成微行冥索消滅

無名

無註

巽

積水不溫北陸苦寒露宿多風君子  
傷心

無註

允

黃馬綠車駕之大都讚達才能使我  
無憂

無註

渙

從風放火艾芝俱死三害集聚十子  
患傷

艾草名芝靈草被火則俱死即玉

石俱焚之義三害未詳

節

一身三手無益於輔兩足共節不能

克敏

未詳

中孚

南向一室風雨並入塵埃積濕主母  
盲痺偏枯心疾亂我家資

無註

小過

採薇出車魚麗思初上下促急君子  
懷憂

采薇出車魚麗比日詩篇名采薇言  
出戍之時采薇以食而念歸期之  
遠也出車之詩勞還率也魚麗之  
詩燕饗之樂歌也



既濟

先易後否告我利市騷蘇自苦思吾

故止

無註

未濟

生宜地乳上皇大喜降我社福貴壽

無極

無註

三三  
坎上 艮下  
蹇

同載共輿中道別去喪我元夫獨與  
孤居

無註

之乾

叔盼拘寃祁子自邑乘遽解患羊舌  
免晚賴得全生

按春秋叔盼即叔向祁子即祈奚

羊舌虎叔向弟也晉范宣子殺虎  
囚向祁奚聞之乘駟而見宣子言  
叔向之善宣子悅言諸公而免之  
眇當作盼晚當作脫

坤

兔聚東郭衆犬俱獵圍缺不成無所  
能獲

東郭斂海內之狡兔

屯

作室山根人以為安一旦崩頽敗我  
盤殮

無註

蒙

疾風塵起亂擾崩始強大并小先否  
後喜

無註

需

潔齊浴沐思明君德哀公怯弱風氏  
復北

春秋哀公十四年六月甲午齊陳  
恒弒簡公于舒州孔子齊三日沐  
浴而朝告請討之公使告季氏此  
言哀公怯弱而受制於季氏不敢  
專也

訟

土瘠瘦薄培塿無栢使我不樂

無註

師

褰衣涉河水深漬罷賴幸舟子濟脫

無他

無註

比

送我季女至于蕩道齊子旦夕久留  
連處

季女齊子齊襄公妹魯桓公夫人  
也桓公十八年公與夫人姜氏如  
齊詩云魯道有蕩齊子庸止

小畜

三孫六子安無所苦中歲發殆亡我  
所使

無註

履

偃風揚草塵埃俱起清濁溷散忠直

隱處

無註

泰

歷險登危道遠勞罷玄豕自歸困涉

大波



無註

否

六藝之門仁義俱存  
鎡基逢時堯舜  
爲君傷寒熱温下室  
黃泉

六藝禮樂射御書數

同人

被服文衣遊觀酒池  
上堂見觴喜爲  
吾兄使我憂亡

史記商紂無道始爲象箸箕子歎  
曰錦衣九重高臺廣室稱此以求  
天下不足矣又爲酒池肉林武王  
伐之遂亡其國

大有

生時不利天命災至制於斧癩晝夜  
苦勤

無註

謙

天門開闢牢戶寥廓桎梏解脫拘囚  
縱釋

無註

豫

川淵難遊水為我憂多言少實命鹿  
為駒建德開基君子逢時利以仲疑

無註

隨

鄉歲逢時與生為期枝葉盛茂君子  
無憂

無註

蠱

六鷁退飛為衰敗祥陳師合戰左股  
夷傷遂崩不起霸功不成

春秋僖公十六年正月六鷁退飛

過宋都二十二年十一月宋公及  
楚人戰于泓宋師敗績公傷股二  
十三年五月公卒傷於泓故也鷓  
當作鷓

臨

雷君出棊隱隱西行霖雨不止流爲  
巨江南國以傷

無註

觀

牙孽生齒室蟠啓戶幽人利貞鼓翼  
起舞

按後卦小畜之睽一作牙孽生達  
義通

噬嗑

火起上門不爲我殘跳脫東西獨得  
生完不利出鄰病疾憂患

無註

賁

舉事無成不利出征言不可用衆莫能平

無註

剝

老狼白驢長尾大狐前顛卻躡進退

遇崇

無註

復

日入道極勞者休息班馬還師復我  
燕室

春秋襄公十八年齊師夜遁有班  
馬之聲註馬不相見故鳴班別也  
無妄

林麓山藪非人所處鳥獸無禮使我



心苦

無註

大畜

蓄利積福日新其德高氏飲食憂不  
為患

無註

頤

張羅百目鳥不得比縮頸挂翼困於

窮國君子治德獲譽受福

無註

大過

伯虎仲熊德義淵弘使布五教陰陽  
順序

按史高辛氏之子有曰伯虎仲熊  
舜舉八愷使主后土爲伯益之佐  
伯虎疑即仲虎也五教者父子有

親君臣有義夫婦有別長幼有序  
朋友有信

坎

跛躄相隨日暮牛罷凌遲後旅失利

亡雌

無註

離

羸氏違良使孟尋兵師老不已敗於

齊鄉

春秋僖公三十二年杞子自鄭使告于秦曰鄭人使我掌北門之管若潛師以來國可得也秦穆公訪諸蹇叔蹇叔曰勞師以襲遠非所聞也公辭焉召孟明西乞白乙使出師遂敗于殽秦嬴姓

咸

卷十一  
四十六  
日月並居常闇且微高山崩巔丘陵  
為谿

無註

恒

鳥鵲食穀張口受哺蒙被恩德長大  
成就柔順利貞君臣合好

無註

遯

雖躓復起不毀牙齒克免平復憂除

無疾

無註

大壯

草木黃落歲暮無室虐政爲賊大人

失福

無註

晉

避凶東走反入禍口制於牙爪骨爲

灰土

無註

明夷

欲飛不能志苦心勞福不我求

無註

家人

羔裘豹袂東與福遇駕迎吾兄送我

驪黃

無註

睽

東耕破犁西失良妻  
蓄害不避家貧

無資

無註

解

魚陸失所鳧龜困苦  
澤無瞿蒲晉國



以虛

鼃音蛙 藿音桓

損

行役未已新事復起  
姬姜勞苦不得  
休止

無註

益

脫足無蹄  
三步五罷  
南行不進  
後市

身苦

無註

夬

白日揚光火爲正王消金厭兵雷車  
避藏陰雨不行民安其鄉

無註

遘

放銜垂轡犇馬不制弃法作姦君失

其位

無註

萃

司命下游喜解我憂皇母緩帶嬰子

笑喜

無註

升

黃帝出遊駕龍乘馬東上大山南過

齊魯邦國咸喜

黃帝邑於涿鹿之阿遷徙無常以  
兵師爲營衛後得六相而天地治  
神明至

困

旣往不說憂來禍結北戶爲患無所  
申雪

無註

井

荷蕢隱名以避亂傾終身不仕遂其  
潔清

論語有荷蕢而過孔氏之門者註  
云荷蕢隱士也

革

折挺春稷君不得食頭痒搔跟無益  
於疾

無註

鼎

植根不固華葉落去便爲枯樹

無註

震

凶門生患牢戶多冤沙池秃齒使叔

困貧

無註

艮

登山履谷與虎相觸狷為功曹班叔  
奔北脫之喜國

史記龜策傳郭璞曰蝮能制虎

漸

麟鳳所翔國無咎殃賈市十倍復歸  
惠里

無註

歸妹

路險道難水遏我前進往不利迴車  
復還

無註

豐

延頸望邑恩歸其室臺樹不成未得  
安息

無註



旅

蒙生株瞿棘挂我須小人妬嫉使恩  
不遂

無註

巽

南至隱域深潛處匿聰明閑塞與死  
爲伍

無註

允

機餌設張司暴子良范叔不廉凶害  
及身

春秋鄭子孔乃子良之父其為政  
也專國人患之殺子孔而分其室  
子良奔楚魏范睢字范叔嘗從須  
賈使齊齊王喜其辨賜睢金與牛  
酒賈歸告魏相魏齊疑告以國陰

事魏齊怒笞擊睢折脅摺齒置於  
廁使醉客溺之

渙

從騎出門遊戲空城阪高不進利無  
所得

無註

節

西國強梁爲虎作狼東吞楚齊并有

其王

史記秦為狼虎之國始皇王翦虜  
楚王負芻以其地置楚郡二十六  
年王賁自燕南攻齊齊王遂降而  
天下混一

中孚

登山伐輻虎在我側王孫無懼仁見  
不賊

無註

小過

六月睽睽各欲有望後來未壯俟時

旦明

無註

既濟

道涉多阪牛馬蜿蟺車不麗載請求  
不得

無註

未濟

一口三舌相妨無益群羊百牂不爲  
威強亡馬失駒家耗於財

無註

☵☵  
坎下解  
震上角

駕行出遊鳥鬪車前更相掙滅兵寇  
旦來迴車亟還可以無憂

無註

之乾

大都之居無物不具抱布貿絲所求  
必得

詩氓之篇氓之蚩蚩抱布貿絲匪  
來貿絲來即我謀

坤

膠着木連不出牢閔家室相安

無註

屯

孟伯食長懼其畏王賴四蒙五抱福

歸房

無註

蒙

防輿疲駟不任銜轡君子服之談何  
容易



無註

需

許嫁既婚利福在身適惠生桓為我

魯君

左傳宋武公生仲子仲子生而有  
文在手曰為魯夫人故仲子歸于  
惠公生桓公

訟

入門大喜上堂見母妻子俱在兄弟

饒友

無註

師

推車上山力不能任顛蹶蹉跌傷我

中心

無註

比

鴈飛退去不食其雛禽尚如此何況  
人與

無註

小畜

福弃我走利不可得幽人利貞終無  
怨慝

無註

履

夫妻反目不能正室翁云于南嫗言  
還北並后匹嫡二政亂國

易小畜卦輿脫輹夫妻反目

泰

陽衰伏匿陰淫為賊賴幸王孫遂至

喜國

無註

否

卷之五  
五十八  
入山求玉不見和璞終日至暮勞無所得

卞和得玉璞三獻楚剖之果有美玉焉

同人

鳴鸞四牡駕出行狩合格有獲獻公飲酒

詩車攻篇言周宣王往狩于圃田

也田車既好四牡孔阜東有甫草  
駕言行狩

大有

覆手舉牘易為功力月正元日平飲

致福

無註

謙

三火高明兩減其光高位疾顛驕恣

誅傷

無註

豫

裹糗荷糧與利相逢高飛有德君大

獲福

糗糒也擣粉熬豆為之

隨

道理和得人  
不相賊君子往之樂有

利福

無註

蠱

水土相得萬物蕃殖膏澤優渥君子

有德

無註

臨

天孫帝子與日月處光榮於世福祿



繁祉

無註

觀

陪依在位乘非其器折足覆餗毀傷

寶玉

易鼎卦九四鼎折足覆公餗其形

渥凶

噬嗑

鷓飛中退舉事不遂且守仁德猶免  
失墜

鷓當作鷓春秋宋六鷓退飛襄公  
問於周内史叔興曰是何祥也對  
曰君將得諸侯而不終

賁

經棘正冠意盈不廉桀紂速讒惑佞  
傷賢使國亂煩一作桀紂迷惑讒佞

傷賢

夏桀商紂皆傷賢敗國之君也

剥

申酉退跌陰慝前作柯條華枝復泥

不白

未詳

復

平正賤使主服苦事

無註

無妄

釣魴河湄水長無涯振手徒歸上下  
昏迷屬公孫齊

春秋魯昭公二十五年公孫于齊  
居於陽州內諱奔謂之孫作去聲

大畜

胎養萌生始見兆形遭逢雷電摧角

折頸採蠶山頭終安不傾

詩載馳篇云陟彼阿丘言采其蠶  
蠶貝母也主療鬱結之疾

頤

陽春枯槁夏多水潦霜雹俱擊傷我  
禾黍年歲困苦

無註

大過

三身六齒痛疾不已齧病蠹缺墮落  
其宅

齧音矩齒蠹也

坎

失恃無友嘉禍出走僇如喪狗

家語孔子去魯累累若喪家之狗

離

寅重微民歲樂年息有國無咎君子

安喜

無註

咸

登几上車駕駟南遊合從散衡燕秦

以強

蘇秦主從張儀主衡秦事燕儀事

秦按禮部韻毛居正曰以六攻一

為從以一離六為橫合之曰從衡

恒

鳥集茂林順柔利貞心樂願得感戴  
慈母

無註

遁

啓蟄始生萬物羨榮祉祿未成市賈  
無盈

無註



大壯

驕胡犬形造惡作凶無所能成還自  
滅身

無註

晉

異國他土出良駿馬去如奔車害不  
能傷

無註

明夷

恪敬竟職心不作  
慝君明臣忠民賴  
其福

無註

家人

三女求夫伺候山隅  
不見復關長思  
憂歎

詩氓之篇云不見復關  
泣涕漣漣

復關男子之所居不敢顯名故託  
言之此詩刺淫泆也

睽

駕福乘喜東至嘉國載慶南行離我  
室居

無註

蹇

四姦爲殘齊魯道難前驅執父戒守

無患

春秋魯僖公二十四年周襄王將以狄伐鄭富辰諫曰耳不聽五聲之和爲聾目不別五色之章爲昧心不則德義之經爲頑口不道忠信之言爲嚚狄皆有之四奸具矣衛詩云伯也執殳爲王前驅

損

下擾上煩蠹蟲為患歲飢無年一云  
既不一况有飢年

無註

益

雞稚失雛常畏狐狸黃池要盟越國  
以昌

春秋外傳吳王夫差會晉公午於  
黃池越王勾踐乃命范蠡帥師沿

海沂淮絕吳路始率中軍沂江以  
襲吳入其郛焚其姑蘇徙其大舟  
事在魯哀公十三年

夫

堅冰黃鳥終日悲號不見白粒但觀  
蓬蒿數驚執鳥鳥孰為我憂

無註

遘

王統鐵頤倉庫空虛賈市無盈與我  
爲仇一云時不我與我之利爲作一  
云倉庫滴空人誰與同

統當作銑按韻註鍾口兩旁曰銑  
又云銑金之澤者鐵頤未詳

萃

竊名盜位居非其家霜隕不實為陰  
所賊一云三年室失盜賊自生霜隕

非時菽麥不成

春秋隕霜殺菽註云菽難殺者殺菽知草皆死也

升

賊仁傷德天怒不福斬刈宗社失其本域博要云日中為市各抱所有交易資貨探珠懷寶心悅歡喜

易繫辭日中為市致天下之民聚



天下之貨交易而退各得其所蓋  
取諸噬嗑

困

萬物初生蟄蟲振起益壽增福日受  
其喜

無註

井

和氣所在物皆不朽聖賢居位國無

凶咎

無註

革

麟遊鳳舞歲樂民喜又云鳳舞麟遊  
賢聖作傳歲既豐稔人何以憂

無註

鼎

行行窘步次宿方舍居安不懼姬姜

何憂一云行幸國翫觀俗風君安自  
勞姬姜何憂

無註

震

水深難遊霜寒難涉商伯失利旅人

稽留

無註

艮

跛踦相隨日暮牛罷凌遲後旅失利  
亡雌

無註

漸

一年九鑠更相牽孿案明如市不得  
東西請讞得報日中被刑

讞魚蹇切議獄也

歸妹

春桃生華季女宜家受福多年男為  
邦君

詩周南桃夭篇桃之夭夭灼灼其  
華之子于歸宜其室家

豐

雷鼓東行稼穡凋傷大夫執政君替  
其明

春秋魯自文公薨公子遂殺子赤

旅

立宣公而政在大夫則公室微矣

季世多憂亂國淫遊殃禍立至民無  
以休

無註

巽

發輓温湯過角宿房宜時布和無所  
不通一本云布春令德明物轉芳

無註

允

水中大賈求利食子商人至市空無  
所有

無註

渙

春草萌生萬物敷榮陰陽和調國樂  
無憂樂一和暢何事不亨

無註

節

左眇右盲目視不明下民多孽君失其常

無註

中孚

悅以內安不利出門憂除禍消公孫何尤



無註

小過

丹書之信言不負語易我駢驥君子  
有德

史記漢高祖天下既定與功臣剖  
符作誓丹書鐵券金匱石室藏之

宗廟

既濟

上政搔擾螟蟲並起害我嘉穀年歲  
無稷

無註

未濟

竿旄旌旗執職在郊雖有寶珠無路  
致之

職當作幟衛詩干旄篇云子子干  
旄在浚之郊小序云美好善也

易林卷第十

易林卷第十